

De probatione infra. Argumentum III præcipue torsit *Sveffannum dilucid. l. 5. Zimarum & Mercen. apud quem vide l. c. c. 5.* Nullus tamen in hanc mentem respondit, quia aliis fundamentis nitebantur.

§. 22. Argumentor contra Scotum E. si genus & differentia tantum ratione distinguuntur, non datur differentia individualis. Sed verum prius. E. Major patet, nam etiam species & differentia numerica solum ratione distinguuntur. Min. probatur. 1. Quæ ante operationem mentis differunt, separabilia sunt. Sed genus & differentia non possunt separari. Quamvis enim sint loca quædam Scoti quibus asserat posse fortasse Deum facere ut universalia sint extra singularia, & similiter Genus extra speciem, tamen id absurdum probo, quia nulla daretur divisio adæquata, daretur animal nec rationale nec irrationale. Et daretur motio neq; recta neq; obliqua. 2. Differentia superiores prædicantur de inferioribus, v. g. hæc rationalitas est rationalitas, E. differentia specifica includit in se differentiam generis; E. à genere non differt. Nam genus ad differentiam suam additam habet differentiam generis sui, quæ & ipsa includitur à suâ. Et ita ad usq; summum. Et quia aliquando sistendum est, dixit Aristoteles Ens prædicari de differentiis. Vid. quædam apud *Soncin. l. 7. q. 36. & 37.*

§. 23. II. Si non sunt universalia ante mentis operationem nõ datur compositio ante mentis operationem ex universali & individuante. Non est enim realis compositio, cujus non omnia membra sunt realia. Sed verum prius. E. Min. prob. omne quod ante mentis operationem realiter ab altero ita differt, ut neutrum sit pars alterius vel ex toto vel ex parte, potest ab altero separari. Nam in adæquatè differentibus neutrum altero ad suum esse indiget. E. potest separari per potentiam DEI absolutam, & solum pars à toto ita ut id permaneat, est simpliciter inseparabilis. Min. pro syll. probatur, daretur enim linea realiter neq; recta, neq; curva, quod absurdissimum. v. *Ruv. Logic. de universal. q. 4.*

§. 24. III. Si non datur *distinctio formalis* ruit Hæcceitas. Sed verum prius. E. Antequam probemus de hæc distinctione aliqua differenda sunt, videri autem possunt *Stabl. Comp. Metaph. c. 23 Soncin. l. 7. q. 35. Pofnaniensis 1. sent. d. 34. dubio 64.* Tribuitur communiter Scoto ut media inter *realem & rationis*, unde ejus sectatores dicti *Formalistæ*. Hac putat distingui attributa in Divinis & Relationes Per-